

REGIONAL NEWS UNIT
ALL INDIA RADIO, AGARTALA
Date: 27-03-2024
Time: 07:55-08:05 PM Hrs
BENGALI EVENING BULLETIN

Headlines :

- (১) লোকসভা নির্বাচনের প্রথম দফার মনোনয়ন পত্র জমা নেওয়ার কাজ আজ শেষ হয়েছে । বিহারে প্রথম পর্যায়ের মনোনয়নপত্র গ্রহণ শেষ হবে আগামীকাল ।
- (২) সাংসদ বিপ্লব কুমার দেব ও প্রদেশ কংগ্রেস সভাপতি আশীষ কুমার সাহা পশ্চিম ত্রিপুরা লোকসভা আসনের জন্য এবং মেয়র দীপক মজুমদার রামনগর বিধানসভা কেন্দ্রের উপনির্বাচনের জন্য আজ মনোনয়নপত্র জমা দিয়েছেন ।
- (৩) লোকসভা নির্বাচনের দ্বিতীয় পর্যায়ের বিজ্ঞপ্তি আগামীকাল জারি করা হবে ।
- (৪) টিসিএ পরিচালিত মহিলাদের ঘরোয়া একদিনের সীমিত ওভারের ক্রিকেট প্রতিযোগিতা আজ থেকে শুরু হয়েছে ।

Nomination, 1st phase :

লোকসভা নির্বাচনের প্রথম দফার মনোনয়ন পত্র জমা নেওয়ার কাজ আজ শেষ হয়েছে। তবে, বিহারে, মনোনয়নপত্র জমা দেবার শেষ দিন আগামীকাল। প্রথম পর্যায়ে ১৭টি রাজ্য এবং চারটি কেন্দ্রশাসিত অঞ্চলের ১০২টি লোকসভা আসনে নির্বাচন

অনুষ্ঠিত হবে। তামিলনাড়ুর ৩৯টি আসন, রাজস্থানের ১২টি আসন, উত্তর প্রদেশের ৮টি আসন, মধ্যপ্রদেশের ৬টি আসন, উত্তরাখণ্ড, আসাম ও মহারাষ্ট্রের ৫টি করে আসন, বিহারের চারটি আসন, পশ্চিমবঙ্গের তিনটি আসন, অরুণাচল প্রদেশের দুটি করে আসন। মণিপুর, মেঘালয় এবং ছত্তিশগড়, মিজোরাম, নাগাল্যান্ড, সিকিম, ত্রিপুরা, আন্দামান ও নিকোবর দ্বীপপুঞ্জ, জম্মু ও কাশ্মীর, লাক্ষাদ্বীপ এবং পুদুচেরির একটি করে আসনে প্রথম দফায় ভোট হবে।

আগামীকাল মনোনয়নপত্র পরীক্ষা করা হবে এবং মনোনয়ন পত্র প্রত্যাহারের শেষ তারিখ ৩০শে মার্চ। বিহারে, এই মাসের ৩০ তারিখে মনোনয়ন পত্র পরীক্ষা করা হবে এবং মনোনয়ন পত্র প্রত্যাহারের শেষ তারিখ দোসরা এপ্রিল। ১৯শে এপ্রিল ভোটগ্রহণ অনুষ্ঠিত হবে।

Nomination :

পশ্চিম ত্রিপুরার লোকসভা আসনের নির্বাচন ও রামনগর বিধানসভা উপনির্বাচনে মনোনয়নপত্র গ্রহণের কাজ আজ শেষ হয়েছে। আগামীকাল মনোনয়নপত্রগুলি পরীক্ষা করা হবে। মনোনয়নপত্র প্রত্যাহারের শেষ তারিখ ৩০শে মার্চ। আজ মনোনয়নপত্র জমা দেওয়ার শেষ দিনে বিজেপি প্রার্থী বিপ্লব কুমার দেব ও ইন্ডিয়া জোট সমর্থিত কংগ্রেস প্রার্থী আশিস কুমার সাহা পশ্চিম আসনের রিটার্নিং অফিসার ডাক্তার বিশাল কুমারের কাছে মনোনয়নপত্র জমা দিয়েছেন। এই আসনে ইতিপূর্বে মনোনয়ন জমা দেন বহুজন মুক্তি পার্টির প্রার্থী ব্রজলাল দেবনাথ,

রিপাবলিকান পার্টি অফ ইন্ডিয়া (আথাওয়ালে) দলের প্রার্থী আইনজীবী অর্ণব রায়, এস ইউ সি আই (সি) র অরুণ ভৌমিক, আমরা বাঙালীর গৌরী শংকর নন্দী, ও নির্দল প্রার্থী মিলন পদ মুড়া সিং, রমেন্দ্র রিয়াং ও বলরাম দেববর্মা।

Nomination Rally :

বিজেপি প্রার্থী বিপ্লব কুমার দেবের মনোনয়নপত্র দাখিল উপলক্ষ্যে আগরতলায় মিছিল ও জমায়েতে উপস্থিত ছিলেন মুখ্যমন্ত্রী অধ্যাপক ডাঃ মানিক সাহা, হরিয়ানার মুখ্যমন্ত্রী নায়েব সিং সাইনি, হরিয়ানার প্রাক্তন মুখ্যমন্ত্রী মনোহর লাল খাটটার, অর্থমন্ত্রী প্রণজিৎ সিংহ রায়, বিদ্যুৎমন্ত্রী রতনলাল নাথ, তিপ্রা মথা প্রধান প্রদ্যোত বিক্রম মানিক্য দেববর্মা, বিজেপি রাজ্য সভাপতি রাজীব ভট্টাচার্য সহ অন্যান্য নেতৃবৃন্দ।

এদিকে, কংগ্রেস প্রার্থী আশীষ কুমার সাহার মনোনয়নপত্র দাখিল উপলক্ষ্যে মিছিল ও জমায়েতে উপস্থিত ছিলেন কংগ্রেসের সর্বভারতীয় মুখপাত্র সুপ্রিয়া শ্রীনেং, সর্বভারতীয় কংগ্রেস নেত্রী জারিতা লাইতফ্লাং, সিপিএম রাজ্য সম্পাদক জীতেন্দ্র চৌধুরী, কংগ্রেস বিধায়ক সুদীপ রায় বর্মণ, গোপাল রায়, সিপিআইএম নেতা মানিক দে, পবিত্র কর সহ অন্যান্য নেতৃবৃন্দ।

Deepak Majumder Nomination :

রামনগর বিধানসভা কেন্দ্রের উপনির্বাচনের বিজেপি প্রার্থী তথা পুর মেয়র দীপক মজুমদার আজ রিটার্নিং অফিসার বিপুল দাসের

কাছে মনোনয়ন পত্র জমা দেন। এর আগে প্রার্থী সহ দলের কার্যকর্তা ও আগরতলা পুর নিগমের কর্পোরেটররা প্রগতি স্কুল মাঠে জমায়েত হয়ে একটি রেলির মাধ্যমে শহর পরিক্রমা করে সদর মহকুমা শাসকের দপ্তরে পৌঁছান। সেখানে মনোনয়ন পত্র জমা দেবার সময় উপস্থিত ছিলেন দলের প্রদেশ সহ সভানেত্রী পাপিয়া দত্ত, সংখ্যালঘু মোর্চার নেতা জসিমুদ্দিন প্রমুখ। মনোনয়ন পত্র জমা দিতে যাওয়ার আগে শ্রী মজুমদার বলেন দল তাঁর উপর যে আস্থা রেখেছে তার মর্যাদা তিনি রাখতে সর্বদা চেষ্টা করবেন।

ECI :

লোকসভা নির্বাচনের দ্বিতীয় পর্যায়ের বিজ্ঞপ্তি আগামীকাল জারি হবে। এই পর্বে ১২টি রাজ্য ও কেন্দ্রশাসিত অঞ্চলের ৮৮টি লোকসভা আসনের পাশাপাশি আউটার মণিপুর লোকসভা আসনের ১৩টি বিধানসভা ক্ষেত্রে আগামী ২৬শে এপ্রিল ভোট গ্রহণ করা হবে। কেরলের ২০টি আসন, কর্ণাটকের ১৪টি আসন, রাজস্থানের ১৩টি আসন, উত্তরপ্রদেশ ও মহারাষ্ট্রের আটটি আসন, মধ্যপ্রদেশের সাতটি আসন, আসাম ও বিহারে পাঁচটি আসন, পশ্চিমবঙ্গ ও ছত্তিশগড়ের তিনটি করে আসন এবং মণিপুর, ত্রিপুরা এবং জম্মু ও কাশ্মীরে একটি করে আসনের এই দ্বিতীয় দফায় ভোট হবে।

মনোনয়নপত্র দাখিল করা যাবে চৌঠা এপ্রিল পর্যন্ত। এই পর্বের ভোট হবে ২৬শে এপ্রিল। জম্মু ও কাশ্মীর বাদে সমস্ত রাজ্য ও কেন্দ্রশাসিত অঞ্চলের মনোনয়নপত্র পরীক্ষা করা হবে ৫ই এপ্রিল। জম্মু ও কাশ্মীরে পরীক্ষা করা হবে ৬ই এপ্রিল।

SVEEP (Election) :

আসন্ন লোকসভা নির্বাচনে ভোটারদের আরও বেশি করে ভোটদানে উৎসাহিত করতে আজ নরসিংগড়ের টিআইটিতে ছাত্রছাত্রীদের নিয়ে এক সচেতনতামূলক কর্মসূচীর আয়োজন করা হয়। সেন্ট্রাল ব্যুরো অফ কমিউনিকেশন এর উদ্যোগে এবং রাজ্যের মুখ্য নির্বাচন আধিকারিকের কার্যালয়ের সহযোগিতায় আয়োজিত এই কর্মসূচীর মধ্যে ছিল ছাত্রছাত্রীদের মধ্যে নির্বাচন সংক্রান্ত বিষয়ে কুইজ প্রতিযোগিতা, ভারতে নির্বাচন বিষয়ে চিত্রাঙ্কন প্রতিযোগিতা ও আলোচনাচক্র। আলোচনা চক্রের প্রধান অতিথি রাজ্যের অতিরিক্ত মুখ্য নির্বাচন আধিকারিক শুভাশিষ বন্দ্যোপাধ্যায় বলেন, আরও বেশি সংখ্যায় ভোটদানের ব্যাপারে ভোটারদের সচেতন ও শিক্ষিত করে তোলার উদ্দেশ্যে ভারতের নির্বাচন কমিশন ২০০৯ সাল থেকে সিস্টেমটিক ভোটার এডুকেশন অ্যান্ড ইলেকটোরাল পার্টিসিপেশন অর্থাৎ SVEEP চালু করে। পরে নির্বাচন কমিশন, C-Vigil-সহ এমন কিছু অ্যাপের প্রচলন করেছে যাতে ভোটাররা তাদের বিভিন্ন বিষয়ে অভিযোগ জানাতে পারেন, তথ্য যাচাই করতে পারেন। তিনি বলেন, প্রকৃত জনপ্রতিনিধি নির্বাচনে সকলের ভোটদান করা কর্তব্য। তিনি ভোটার হওয়া ছাত্রছাত্রীদের প্রত্যেককে ভোটদানে এগিয়ে আসার আহ্বান জানান ও পাশাপাশি ছাত্র ছাত্রীরা যেন তাদের পিতামাতা ও প্রতিবেশীদের ভোটকেন্দ্রে গিয়ে ভোটদানে আগ্রহী করে তোলেন, সেই দায়িত্ব নেওয়ার জন্য অনুরোধ জানান। অনুষ্ঠানের শুরুতে সেন্ট্রাল ব্যুরো অফ কমিউনিকেশন এর আধিকারিক সুদীপ্ত কর ভোটদানের মত গনতন্ত্রের পবিত্র কর্তব্য পালনে ছাত্র ছাত্রীদের শপথ বাক্য পাঠ করান। আলোচনা চক্রে ত্রিপুরা ইনস্টিটিউশান অফ টেকনোলজির অধ্যক্ষ বিজয় কুমার উপাধ্যায়, বক্তব্য রাখেন।

Traning of Polling Personal-Unakoti :

লোকসভা নির্বাচন উপলক্ষ্যে আজ ঊনকোটি জেলার কুমারঘাটের পঞ্চায়েতীরাজ ট্রেনিং ইনস্টিটিউট, মানসী মিলনায়তন ও পঞ্চায়েত সমিতির হলে ভোটকর্মীদের মহড়া অনুষ্ঠিত হয়। এখানে ভোটকর্মীদের করণীয় কর্তব্য, নির্বাচন কমিশনের নির্দেশিকা ইত্যাদি বিষয়ে অবহিত করা হয়। আজ সর্বমোট ৮৮১ জন ভোটকর্মীদের প্রশিক্ষণ দেওয়া হয়েছে।

আজকের কর্মসূচিতে উপস্থিত ছিলেন, ঊনকোটি জেলার অতিরিক্ত জেলা শাসক দশরথ দেববর্মা, কুমারঘাটের S.D.M তথা ২নং পূর্ব ত্রিপুরা সংসদীয় আসনের সহকারী রিটার্নিং অফিসার এন,এস, চাকমা প্রমুখ।

Cuet ug entrance :

লোকসভা ভোটের পরিপ্রেক্ষিতে স্নাতক স্তরের কমন ইউনিভার্সিটি এন্ট্রান্স পরীক্ষার জন্য আবেদনের সময়সীমা বাড়ানো হয়েছে। ২৬ মার্চের পরিবর্তে ৩১ মার্চ পর্যন্ত আবেদন করা যাবে। ইউনিভার্সিটি গ্রান্টস কমিশনের চেয়ারম্যান এম জগদীশ কুমার আজ এসংবাদ জানিয়েছেন।

তিনি জানান, ছাত্রদের তরফে এবং বিভিন্ন পক্ষের থেকে কমন ইউনিভার্সিটি ১৫ থেকে ৩১ মে পর্যন্ত প্রতিদিন দুই বা তিনটি শিফটে পরীক্ষা অনুষ্ঠিত হবে এবং ৩০ জুন ফলাফল ঘোষণা করা হবে।

Ramkrishna Mission :

রামকৃষ্ণ মঠ ও মিশনের অধ্যক্ষ স্বামী স্মরণানন্দের শেষকৃত্য অনুষ্ঠান আজ রাত ৯টায় বেলুড়মঠে অনুষ্ঠিত হবে। আজ ভোর থেকে বেলুড়মঠে ভক্তরা সারিবদ্ধভাবে প্রয়াত স্বামী স্মরণানন্দজীর নশ্বর দেহে শেষ শ্রদ্ধা নিবেদন করছেন। আজ সন্ধ্যায় বেলুড় মঠ থেকে আকাশবাণীকে এসংবাদ জানানো হয়েছে।

SVEEP-Kailashahar :

কৈলাশহরের রামকৃষ্ণ মহাবিদ্যালয়ে আজ "সিষ্টেমেটিক ভোটরস এডুকেশন এন্ড ইলেক্টুরেল পার্টিশিপেশন" বিষয়ে এক অনুষ্ঠান হয়। আয়োজনে ছিল, ভারত সরকারের তথ্য-সম্প্রচার মন্ত্রকের অধীন সেন্ট্রাল বুরো অব কমিউকেশন, কৈলাশহর শাখা।

এখানে মুখ্য বক্তা হিসাবে উপস্থিত ছিলেন, ঊনকোটি জেলা প্রশাসনের উপ-সমাহর্তা সোমা দেবা। তিনি তাঁর ভাষনে বলেন, বিশ্বের বৃহত্তম গনতান্ত্রিক দেশে নাগরিকদের ভোট দেওয়া সাংবিধানিক অধিকার ও কর্তব্য। ভোটদান এদেশে উৎসবের মেজাজে হয়ে থাকে। ভোটের তালিকায় নাম অন্তর্ভুক্তির নিয়ম সম্পর্কেও তিনি আলোকপাত করেন।

বক্তব্য রাখেন, নেতাজি বিদ্যাপীঠ ইংরাজি মাধ্যম বিদ্যালয়ের অধ্যক্ষ অসিত দত্ত, আয়োজক দপ্তরের ভারপ্রাপ্ত আধিকারিক এইচ, কে, চেঙ প্রমুখ। সভাপতিত্ব করেন, কলেজের অধ্যক্ষ ডক্টর পিণাকী পাল। এখানে তথ্যচিত্র প্রদর্শনের মাধ্যমে ভোটদানের বিষয়ে উৎসাহিত করা হয়।

Workshop :

রাজ্য শিল্প ও বাণিজ্য দপ্তরের উদ্যোগে এবং ত্রিপুরা ইনস্টিটিউশন ফর ট্রান্সফরমেশন-এর সহায়তায় "বিজনেস রিফর্মস অ্যাকশন প্ল্যান-2024" শীর্ষক এক কর্মশালা আজ থেকে রাজধানীর প্রজ্ঞা ভবনে শুরু হয়েছে। দুদিনের এই কর্মশালার উদ্বোধন করে মুখ্যসচিব জে,কে সিনহা রাজ্যে ব্যবসা ও শিল্প স্থাপনে যারা উদ্যোগী হচ্ছেন তাদের সর্বোত্তমভাবে সহায়তা করার জন্য সংশ্লিষ্ট সরকারী দপ্তর গুলির প্রতি আহ্বান জানিয়েছেন। অনুষ্ঠানে অন্যান্যদের মধ্যে উপস্থিত ছিলেন শিল্প ও বাণিজ্য দপ্তরের সচিব কিরণ গিত্যে ও অধিকর্তা বিশ্বশ্রী বি, সহ সংশ্লিষ্ট বিভিন্ন দপ্তরের সচিব, অধিকর্তা ও আধিকারিকগণ।

Basanta utsav :

বিলোনিয়ার ঈশ্বরচন্দ্র বিদ্যাসাগর কলেজে বটবৃক্ষের ছায়ায় শান্তিনিকেতন নামাঙ্কিত অঞ্চলে আজ ছাত্রছাত্রীদের উদ্যোগে শিক্ষক অশিক্ষক কর্মীদের উপস্থিতিতে বসন্ত উৎসবের আয়োজন করা হয়েছে। বিলোনিয়ার পুর পরিষদের চেয়ারম্যান নিখিল চন্দ্র গোপ উৎসবের সূচনা করেন। কলেজের অধ্যক্ষ মনোরঞ্জন দাস অনুষ্ঠানে পৌরহিত্য করেন। বিলোনিয়া থানার ওসি শিবুরঞ্জন দে, কলেজের শিক্ষক সংসদের সম্পাদক ড. বিমল কিশোর আচার্য, সংস্কৃতি বিনোদন বিষয়ক কমিটির সম্পাদিকা ড: মৌঝুরী ভৌমিক প্রমুখ উৎসবে উপস্থিত ছিলেন।

Women's Cricket :

টিসিএ পরিচালিত মহিলাদের ঘরোয়া একদিনের সীমিত ওভারের ক্রিকেট প্রতিযোগিতা আজ থেকে শুরু হয়েছে। প্রথম দিনে অনুষ্ঠিত ৩টি খেলায় এডি নগর কোচিং সেন্টার, এগিয়ে চলো সংঘ ও তরুণ সংঘ কোচিং সেন্টার জয়লাভ করেছে। এম বি বি স্টেডিয়ামে অনুষ্ঠিত খেলায় এডি নগর কোচিং সেন্টার ৫ উইকেটে ভগিনী নিবেদিত মহিলা সমিতিকে, তালতলা মাঠে এগিয়ে চলো সংঘ ১০ উইকেটে ক্রিকেট অনুরাগী কোচিং সেন্টারকে এবং মেলাঘরে তরুণ সংঘ কোচিং সেন্টার ৩০ রানে লালবাহাদুর ব্যায়ামাগারকে হারিয়ে দেয়। মোট ১১টি দলকে নিয়ে গ্রুপলিগ কাম নকআউট পদ্ধতিতে আসরে চ্যাম্পিয়নশীপের ফয়সলা হবে।

T- 20 Cricket Tournament at Baikhora :

শান্তিরবাজার মহকুমা ক্রিকেট এসোসিয়েশন আয়োজিত সিনিয়র টি- ২০ ক্রিকেট টুর্নামেন্টে চ্যাম্পিয়ান হল বুরু জোয়ান মুথু। আজ বাইখোড়া মাঠে আসরের ফাইনাল ম্যাচে রেঞ্জ ক্লাবকে ৪১ রানে হারায় তারা। প্রথমে ব্যাট করতে নেমে বিজয়ী দল বুরু জোয়ান মুথু নির্ধারিত ২০ ওভারে ৯ উইকেটে ১৮৬ রান করে। জবাবে খেলতে নেমে ১৭.৪ ওভারে ১৪৫ রানে অলআউট হয়ে যায় রেঞ্জ ক্লাব।

Belonia Senior Cricket :

বিলোনিয়া মহকুমা ক্রিকেট এসোসিয়েশন আয়োজিত সিনিয়র ডাবল লীগ কাম নক আউট ক্রিকেট টুর্নামেন্টের আজকের ম্যাচে

দক্ষিণ বিলোনিয়া প্লে সেন্টার ১২২ রানে হারালো দক্ষিণ ভারতচন্দ্র নগর প্লে সেন্টারকে। বিদ্যাপীঠ মাঠে অনুষ্ঠিত ম্যাচে টসে জিতে প্রথমে ব্যাট করতে নেমে দক্ষিণ বিলোনিয়া প্লে সেন্টার ৩৩.১ ওভারে ২০৫ রানে অলআউট হয়ে যায়। জবাবে খেলতে নেমে ২৬.৪ ওভারে ৮৩ রানে অলআউট হয়ে যায় দক্ষিণ ভারতচন্দ্র নগর প্লে সেন্টার।

State wise 13 Cricket :

টিসিএ পরিচালিত রাজ্যভিত্তিক অনূর্ধ্ব ১৩ বছরের ক্রিকেট প্রতিযোগিতায় সদরের দুটি দল সেমিফাইনালের উঠেছে। আসরের কোয়ার্টার ফাইনালে নরসিংগড়ের পঞ্চায়েত মাঠে সদর-বি ১ উইকেটে শান্তিরবাজারকে এবং নেপকো মাঠে সদর-এ ৯ রানে কৈলাসহরকে পরাজিত করে। আগামীকাল অপর দুটি কোয়ার্টার ফাইনাল অনুষ্ঠিত হবে।

Weather :

আগামীকাল আকাশ আংশিক মেঘাচ্ছন্ন থাকবে। দুয়েক জায়গায় বজ্র বিদ্যুত সহ হালকা বৃষ্টিপাতের সম্ভাবনা রয়েছে। তাপমাত্রা সর্বোচ্চ তেত্রিশ ডিগ্রী এবং সর্বনিম্ন বাইশ ডিগ্রী সেলসিয়াস এর কাছাকাছি থাকবে। আজ দিনের সর্বোচ্চ তাপমাত্রা ছিল চৌত্রিশ ডিগ্রি এবং সর্বনিম্ন একুশ দশমিক দুই ডিগ্রি সেলসিয়াস। আগামী চব্বিশ ঘণ্টায় রাজ্যের সব জেলায় বিক্ষিপ্তভাবে বজ্র বিদ্যুত সহ বৃষ্টি সঙ্গে ঘণ্টায় ত্রিশ থেকে চল্লিশ কিলোমিটার বেগে ঝড়ো হাওয়া বয়ে যাওয়ার সতর্কতা জারি করেছে আবহাওয়া দপ্তর।

* * * * *